

ԿԱՐԾԻՔ

Նելլի Վանիկի Հունանյանի <<Լոգոպեգական աշխատանքների առանձնահատկությունները վաղ մանկական աուտիզմով երեխաների հաղորդակցման գործընթացում>> թեմայով ԺԳ.00.01<<Մանկավարժության տեսություն և պատմություն>> (Հատուկ մանկավարժություն) մասնագիտությամբ մանկավարժական գիտությունների թեկնածուի գիտական աստիճանի հայցման ատենախոսության վերաբերյալ

Նելլի Հունանյանի ատենախոսական աշխատանքը նվիրված է հատուկ մանկավարժության՝ մասնավորապես լոգոպեդիայի կարևոր և արդիական հիմնախնդիրներից մեկին՝ վաղ մանկական աուտիզմով երեխաների հաղորդակցման գործընթացում լոգոպեդական աշխատանքների առանձնահատկությունների ուսումնասիրմանը, լոգոպեդական մեթոդների, միջոցների, հատուկ պայմանների ստեղծմանը:

Հիմնախնդրի արդիականությունն առաջին հերթին սահմանվում է նրանով, որ տվյալ հիմնախնդրի վերաբերյալ բացակայում են մայրենի լեզվով լոգոպեդական աշխատանքային ուղղեցույցներ, մեթոդական ձեռնարկներ ուղղված վաղ մանկական աուտիզմ ունեցող երեխաների հաղորդակցման գործընթացի ձևավորմանը և զարգացմանը, ինչպես նաև բացակայում են տվյալ երեխաների հաղորդակցման գործընթացը զարգացնող հատուկ հնարներ, մեթոդներ, պայմաններ:

Աշխարհում տարեցտարի մեծանում է աուտիզմ ախտահիշով երեխաների թիվը: Աուտիզմ ունեցող երեխաները տարբերվում են իրենց խնդիրների ծանրության աստիճանով՝ հոգեկան ոլորտի խանգարումներով, վարքային ոլորտներում, խոսքային գործընթացում առկա դժվարություններով, հաղորդակցվելու ցանկության բացակայությամբ: Հետևաբար տվյալ առանձնահատկությունների վեր հանումը, լոգոպեդական աշխատանքների վաղ կազմակերպումը, հատուկ մեթոդների, միջոցների, պայմանների կիրառումը թույլ կտան արդյունավետ զարգացնել այդ երեխաների հաղորդակցման կարողությունները, դրանով իսկ նպաստել հասարակության մեջ նրանց ներառմանը:



Առաջին հերթին կցանկանայինք ընդգծել, որ ատենախոսը բավականին գրագետ ձևակերպել է հետազոտության օբյեկտը, առարկան, վարկածը, նպատակը և խնդիրները, բացահայտել է գիտական նորույթը, տեսական և գործնական նշանակությունը, պաշտպանությանն առաջ քաշվող հիմնական դրույթները: Մա բնութագրում է նրան որպես գիտական աշխատողի:

Ատենախոսը հանգամանորեն իրականացրել է մասնագիտական գրականության վերլուծություն, ուսումնասիրել վաղ մանկական աուտիզմ ունեցող երեխաների բժշկահոգեբանամանկավարժական դասակարգման համակարգերը, վեր հանել այդ երեխաների խոսքի զարգացման առանձնահատկությունները:

Հաստատող գիտափորձի ընթացքում հետազոտողը անցկացրել է վաղ մանկական աուտիզմ ունեցող երեխաների հաղորդակցման ձևավորմանն ուղղված լոգոպեդական աշխատանքի առանձնահատկությունների վերաբերյալ սոցիոլոգիական հարցում, վեր հանել առկա դրական և բացասական կողմերը:

Հաստատող գիտափորձի ընթացքում հետազոտողը 4-7 տարեկան վաղ մանկական աուտիզմ ունեցող ախտորոշմամբ 80 երեխաների մոտ իրականացրել է հայացքով հաղորդակցվելու, իմպրեսիվ և էքսպրեսիվ խոսքի, ոչ խոսքային և խոսքային հաղորդակցման միջոցների կիրառման առանձնահատկությունների հետազոտություններ, որն իրականացրել է իր կողմից մշակած խոսքի հետազոտման քարտի միջոցով:

Ընդհանրացնելով հաստատող հետազոտության արդյունքները, ատենախոսը եկել է այն եզրահանգմանը, որ անհրաժեշտ է մշակել լոգոպեդական աշխատանքների օրինակելի համակարգ:

Ստացած տվյալները հիմք հանդիսացան երկամյա ուսուցողական մանկավարժական գիտափորձի կազմակերպմանը, անցկացմանը և արդյունավետության հիմնավորմանը:

Դրա մասին համոզիչ կերպով վկայում են ստացված մանկավարժական գիտափորձի արդյունքները: Հեղինակի կողմից ներդրված մեթոդներն ու միջոցները թույլ են տվել էականորեն բարձրացնել լոգոպեդական աշխատանքի արդյունավետությունը:



Ատենախոսության վերջում ներկայացված է 151 տարբեր լեզուներով գրականության ցանկ և հարուստ հավելված:

Այսպիսով՝ ատենախոսի կողմից երաշխավորված և փորձարարությամբ հիմնավորված մանկավարժական մեթոդները, միջոցները, ստեղծված հատուկ պայմանները նպաստել են վաղ մանկական աուտիզմ ունեցող երեխաների հայացքով հաղորդակցվելու, ենթարկվելու և նստելու կարողության, իմպրեսիվ և էքսպրեսիվ խոսքի զարգացմանը, նրանց մոտ ազդեսիվ դրսևորումների նվազմանը, շփման շրջանակի ընդլայնմանը, արդյունավետ լոգոպեդական աշխատանքի իրականացմանը:

Փորձարկվողների քանակակազմը, անցկացված հետազոտությունների մասշտաբն ու տևողությունը և հետազոտական գործունեության ընդհանուր ծավալը հեղինակին հնարավորություն են տվել ստանալ ստույգ և կարևոր գիտական նորույթ, որին ատենախոսը տվել է համապատասխան գիտական մեկնաբանություն:

Այս բոլորի հետ մեկտեղ, մենք անհրաժեշտ ենք համարում նշել ատենախոսական աշխատանքի որոշ դիտողություններ՝

1. Բառապաշարի հարստացման գործընթացում ատենախոսը չի կիրառում շոշափողաշարժողական ընկալման մեթոդը, որն համարվում է զգայարանների և խոսքի զարգացման հզոր միջոց:
2. Աշխատանքն էլ ավելի կշահեր, եթե լոգոպեդական աշխատանքների օրինակելի համակարգում ընդգրկվեր երգեցողությունը:
3. Աշխատանքում հպանցիկ է ներկայացված խմբային աշխատանքի կիրառումը լոգոպեդական աշխատանքներում: Հաղորդակցման ունակությունների ձևավորման համար հարկավոր է կոլեկտիվ: Աուտիզմ ունեցող երեխաների հետ աշխատելիս սկզբնական փուլերում դա կարող է լինել փոքրիկ խումբ, որն անհրաժեշտ է շփվելու ունակությունները ձևավորելու համար: Ցանկալի կլիներ խմբային աշխատանքի կազմակերպումը հանգամանորեն ներկայացվել աշխատանքում:
4. Աշխատանքն էլ ավելի կշահեր, եթե ներկայացված լիներ ծնողների հետ համագործակցության ձևերը և միջոցները:



Սակայն մեր կողմից կատարած դիտողությունները չեն իջեցնում Նելլի Հունանյանի ատենախոսական աշխատանքի արժեքը, որը հատուկ մանկավարժությունում (լոգոպեդիայի բնագավառում) համարվում է տեսագործական կարևոր, ավարտուն, ինքնուրույն գիտական աշխատանք:

Ատենախոսության սեղմագիրը և հեղինակի գիտական հրատարակումները (թվով 7) արտացոլում են ատենախոսության հիմնական դրույթները: Ատենախոսի կողմից ստացված գիտական և գործնական արդյունքները կարելի է որակել որպես կարևոր և գիտական մի հիմնախնդրի լուծում:

ԵԶՐԱԿԱՅՈՒԹՅՈՒՆ

Թեմայի արդիականությունը, գիտական նորույթը, տեսագործական նշանակությունը, ստացած արդյունքների հավաստիությունը, եզրահանգումների հիմնավորվածությունը հիմք են տալիս անելու ընդհանուր եզրակացություն այն մասին, որ Նելլի Վանիկի Հունանյանի «Լոգոպեդական աշխատանքների առանձնահատկությունները վաղ մանկական աուտիզմով երեխաների հաղորդակցման գործընթացում» խորագրով ատենախոսությունը լիարժեք և ավարտուն գիտական աշխատանք է, համապատասխանում է ՀՀ գիտական աստիճանաշնորհման կանոնակարգի յոթերորդ կետի պահանջներին ԺԳ.00.01«Մանկավարժության տեսություն և պատմություն» (Հատուկ մանկավարժություն) մասնագիտական թվանիշին, իսկ հեղինակը լիովին արժանի է մանկավարժական գիտությունների թեկնածուի գիտական աստիճանին:

Պաշտոնական ընդիմախոս՝  
մանկ. գիտ. թեկնածու, դոցենտ՝

Անահիտ Մանուկյան

Դոցենտ Ա.Վ.Մանուկյանի ստորագրությունը հաստատում եմ՝  
ՀՊՄՀ-ի գիտական քարտուղար  
մանկ.գիտ.թեկն., դոցենտ՝



Մարիամ Իսախիրյան